

258



# ԱՌԱՋՆՈՐԴՈՒԹԻՒՆ ՀԱՅՈՑ

DIOCESE OF THE ARMENIAN CHURCH OF AMERICA, 630 SECOND AVENUE, NEW YORK, N. Y. 10016 212 686-0710

Archbishop Torkom Manoogian, Primate

Թիւ 28045  
Յունուար 17, 1988

Արժանաշնորհ  
Տ. Յուսիկ Քհնյ. նշանեան  
Առժամեայ Հոփիւ  
Ս. Երրորդութիւն Եկեղեցւոյ  
Թորոնթօ.

Սիրելի Տէր Յուսիկ,

Ամենայն Հայոց Վեհափառ Հայրապետ, նորին Ս. Օծութիւն Տ.Տ. Վազգէն Առաջին Կաթողիկոս, 1982 նոյեմբեր 22 թուակիր նամակով կը յայտնէ թէ Գանատայի նոր կազմուող թեմին համար պատրաստուած Կանոնադրութեան նախագիծը կը նկատէ ընդունելի հիմք, ընթացք տալու համար նոր թեմի կազմաւորման աշխատանքներուն եւ այս նախագիծի տրամադրութիւններուն համաձայն գումարելու Գանատայի անդրանիկ Պատգամաւորական ժողովը . . . :

Ձեզի կը յիշեցնենք թեմական խորհուրդի հետ մեր պատրաստած նախագիծը Հայոց Եկեղեցւոյ Գանատայի թեմը կազմակերպելու համար առնուելիք քայլերուն, Փետրուար 19, 1981ին վաւերացուած եւ Գանատայի մեր եօթը համայնքներուն ղրկուած:

Այդ նախագիծին համաձայն Գործադիր Մարմին մը նշանակուեցաւ որ Մարտ 28էն մինչեւ Յուլիս 31, 1981, հինգ նիստերու մէջ վերանկատեց Գանատայի թեմի Կանոնադրութեան յօդուածները, զանոնք ներկայացուց մեզի եւ թեմական խորհուրդին: Եւ մենք Կանոնադրութիւնը ղրկեցինք Վեհափառ Հայրապետին ի վաւերացում:

Ներկայիս պատրաստ ենք առնելու յաջորդ քայլերը նախագիծին մէջ յիշուած:

Ուստի կը հրահանգենք ձեզ որ 1988 Յունուարէն մինչեւ Մարտ գումարուելիք ծխական Անդամական ժողովի օրակարգին վրայ ղնէք հետեւեալ մասնաւոր հարցերը.

- Ընտրութիւն թեմական պատգամաւորներու Գանատայի առանձին թեմի անունով գումարուելիք առաջին թեմական Պատգամաւորական ժողովին համար:

Գանատայի թեմի Կանոնադրութեան Յօդուած Դ., Գլուխ Ա., Հատուած 55ի տրամադրութեան համաձայն, իւրաքանչիւր ծուխ իրաւունք ունի իր անդամներու թիւին համեմատ աշխարհական պատգամաւորներ ունենալ թեմական Պատգամաւորական ժողովին մէջ, ըստ հետեւեալին.

Մինչեւ 150 անդամ ունեցող ծուխը կ'ունենայ երեք ( 3 ) պատգամաւոր, 151-էն 200՝ չորս ( 4 ) պատգամաւոր, 201-էն 250՝ հինգ ( 5 ) պատգամաւոր, 251-էն 300՝ վեց ( 6 ) պատգամաւոր, 301 կամ աւելին եօթը ( 7 ) պատգամաւոր:

Ծուխ մը եօթը ( 7 ) ընտրուած պատգամաւորներէ աւելի չի կրնար ունենալ:

Եւ Յօդուած Դ., Գլուխ Ա., Հատուած 56ի տրամադրութեան համաձայն, թեմական ժողովի պատգամաւորները կ'ընտրուին երեք ( 3 ) տարուան շրջանի մը համար: Ամէն տարի, իւրաքանչիւր ծուխի պատգամաւորներուն մէկ-երրորդը կը դադրի պաշտօնավարութենէ: Առաջնորդը եւ թեմական խորհուրդը հրահանգ կու տան ծուխերուն կատարելու պատգամաւորներու նոր ընտրութիւն: Անձնափոխանորդ կը նկատուին անոնք որ նոյն ընտրութեան ընթացքին ստացած են յաջորդ բարձրագոյն քուէն իրենց առաւելութեան կարգով: Բոլոր ծուխերը կ'ընտրեն պատգամաւորները եւ կը նշանակեն իւրաքանչիւր պատգամաւորի պաշտօնավարութեան տարիներու թիւը: Երբ թեմական Պատգամաւորական ժողովը նոր կը կազմուի պատգամաւորներուն մէկ-երրորդը կ'ընտրուի մէկ ( 1 ) տարուան պաշտօնավարութեան համար, միւս մէկ-երրորդը՝ երկու ( 2 ) տարուան եւ վերջին մէկ-երրորդը՝ երեք ( 3 ) տարուան համար:

Ընտրութիւնները պիտի կատարուին հետեւեալ կերպով.

1.- Ընտրողական Յանձնախումբը պիտի ճշդէ ծուխին տրատու անդամներուն ստոյգ թիւը, համաձայն 1982 Յունուարին գումարուած ծխական Անդամական ժողովի արձանագրութեան:

2.- Ընտրողական Յանձնախումբը պիտի ճշդէ թիւը պատգամաւորներուն որ ծուխը իրաւունք ունի ընտրելու, Կանոնադրութեան Յօդուած Դ., Գլուխ Ա., Հատուած 55ի տրամադրութեան համաձայն, եւ ծխական ժողովին պիտի ներկայացնէ ընտրելիներու երկպատիկ ցանկը:

3.- Եթէ ծուխը իրաւունք ունի իր ներկայ պատգամաւորներուն թիւին վրայ յաւելում ընելու, Ընտրողական Յանձնախումբը պէտք է պատրաստէ երկպատիկ ցանկ մը ընտրելիներու, ամբողջացնելու համար ծուխին ներկայ պատգամաւորներուն թիւը:

4.- Գործադրելու համար կանոնադրութեան Յօդուած Դ., Գլուխ Ա., Հատուած 56ի տրամադրութիւնը եւ ճշդելու համար իւրաքանչիւր պատգամաւորի ծառայութեան տարիները, Ընտրողական Յանձնախումբը առաջարկ մը պարտի ներկայացնել ծխական Անդամական ժողովին:

5.- Մինչեւ Գանատայի թեմին պաշտօնապէս յայտարարուիլը իբրեւ անջատ եւ առանձին թեմ, ծուխին ներկայ թեմական պատգամաւորները եւ ծխական Խորհուրդի անդամները կը շարունակեն իրենց պաշտօնները եւ պատասխանատուութիւնները համաձայն Հայց. Եկեղեցւոյ Հիւսիսային Ամերիկայի Արեւելեան թեմի կանոնադրութեան եւ ենթակայ Առաջնորդին եւ թեմական Խորհուրդի եւ թեմական Պատգամաւորական ժողովի իշխանութեան:

6.- Կատարուած ընտրութիւններու արդիւնքը պէտք է ներկայացնէք մեզի եւ թեմական Խորհուրդին, որպէս զի Գանատայի նոր թեմի անունով ընտրուած պատգամաւորները հրաւիրենք գումարուելիք առաջին թեմական Պատգամաւորական ժողովին, որուն թուականը, տեղը եւ օրակարգը պիտի յայտնենք իր ժամանակին:

7.- Գանատայի առանձին թեմը կազմակերպելու համար պատրաստուած նախագիծին մէջ յիշուած Գործադիր Մարմինին պաշտօն յանձնած ենք որ առաջին առիթով Հայաստանեայց Առաքելական Սուրբ Եկեղեցւոյ Գանատայի թեմը՝ արձանագրեն (ինքօրփօրէյթ) իբրեւ զանատական իրաւական անձնաւորեալ կազմակերպութիւն:

Գործադիր Մարմինը նաեւ պաշտօն ունի ճշդելու տեղը եւ թուականը գումարուելիք առաջին թեմական Պատգամաւորական ժողովին, 1983 Յունիս ամսուան ընթացքին:

Սիրոյ ողջունիւ

ԹՈՐԳՈՄ ԱՐՔԵՊԻՍԿՈՊՈՍ  
Առաջնորդ

3.4.-

1.- Նօրթ Եորքի Ս. Խաչ Հայց. Առաքելական Եկեղեցւոյ ծուխի տրատու անդամներուն թիւը պիտի ճշդուի համաձայն 1982 Սեպտեմբերին գումարուած Անդամական ժողովի մէջ արձանագրուած տրատու անդամներու թիւին:

2.- Օթթաուայի ծխական Խորհուրդը պիտի կատարէ Ընտրողական Յանձնախումբի պաշտօն եւս: Տրատու անդամ պիտի նկատուին համայնքին այն անձերը որոնք Գանատայի թեմի նոր կանոնադրութեան Յօդուած Գ., Գլուխ Ա., Հատուած 5, 7 եւ 8-ի համաձայն կ'արձանագրուին տրատու անդամ: Այս առաջին արձանագրուելուն պայմանաժամ կը ղնենք թեմական Պատգա-

մաւոր ընտրելու համար ծխական խորհուրդի նշանակելիք Անդամական ժողովի թուականէն երկու շաբաթ առաջ: Եթէ ժողովի թուականը Մարտ 30 է, մինչեւ Մարտ 15 արձանագրուած անդամներ կրնան քուէարկութեան մասնակցիլ:

Այս առաջին ծխական Անդամական ժողովին արձանագրուած ոեւէ անձ քուէարկելու իրաւունք պիտի ունենայ, անտես առնելով Յօդուած Գ., Գր-լուի Ա., Հատուած 7-ի մէջ յիշուած պայմանները: